



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 8

Party 21-i Rahul PM kümdaktsütsü
asalentong yanglur: Amit Shah

Arsenal-i Chelsea nungi
Kai Havertz alizükogo



VOL. XX NO. 258 (ADOK 258) DIMAPUR

KÜPTOKNÜ (SATURDAY)

CHITENI (JULY) 01, 2023

₹ 5.00

Manipur nung Biren-RSS Experiment inyaker: RPP

Dimapur, June 30, 2023 (TYO): May 3, 2023 anogo nungi Manipur nung mepetmesü adoka raraba sülen ita ana jungnüa arudang Manipur CM Biren Singh-i Imphal valley nung aliba Kuki nunger ajak meindoktsü atema 'Manipur Experiment' inyakba kuli angur, ta Rising People's Party (RPP)-i ashi.

Manipur sorkari Kuki nunger samatsütsü merangba aitsür. Biren Singh aser Meitei telungpurtemi mapang talangka "Manipur Experiment" ya atonga aruba lir. Imphal Valley nung kin balala temeyoktep alidaka May 4 nü Kuki nunger ki ajiteta rongdoktsüba ajanga iba kuli agütsür, ta RPP-i ashi.

"Manipur Experiment" ajanga Meitei nunger telungpurtem teyari agia Imphal Valley meketa aliba tenemtsüng nung Kuli nunger yimtsng ajunga rongdoktsüogo. Iba ajanga Imphal Valley nung aser temeket aliba Kuki nunger meyrjang aika Nagaland, Mizoram, Churachandpur, Guwahati, Delhi aser tangalen refugee kümogo, ta RPP-i sangdong ka nung ashi.

Tanabuba nung RSS-Biren experiment ajanga Imphal valley nungi Kuki nunger aridokba dang masü saka tenla kitem nunga

kongshiogo. Osang angashiba agi Kuki nunger tenla ki noklang aika rongdoktsüba dang masü saka Meitei nunger tenla ki noklang aika rongdoktsüogo. Iba ya ajanga Prime Minister Modi-i experiment metembang tashi ola madoker asütsü akok, ta RPP-isa ashi.

Kuki nunger tenemtsünglen toktsür jena aoba ajanga Greater Meitei-Land tebilemba takok ngur asütsü akok. Iba jagi Biren Singh-i chief minister menden nungi alutsüba drama asaya tenzükogo aser iba ya tejak meidokba mapa ka dang lir. Centre nung BJP sorkari Manipur nung tensa süngjemtsü atema inyaker ta sayunüba agi Biren Singh indang drama asayar, ta parnokisa metetdaktüsügo.

"Manipur Experiment" ya Manipur nung aliba Naga nunger atema majung kechiyong state sorkari teyari agüja inyaker Meitei telungpurtemi Kuki nunger kishizüng nung dangbo metembangtsü, ta RPP-isa ashi.

Lisopurtem samatsüba sülen Manipur nung Naga, Kuki aser Meitei nunger külemi liyonga moutettsü. Iba atema lenmang ka dang lir aser ibaji kimasemprong atema executive, legislative aser financial powers lemdangtsüba dang lir, ta RPP-isa metetdaktüsü.

Biren Singh-i Manipur CM menden metoktsütsü

New Delhi, June 30, 2023 (Agencies): Manipur Chief Minister N Biren Singh-i Hokolbarnü Chief Minister menden metoktsütsü ta osang metetdaktüsügo.

"Iba ama tensa ka nung ni Chief Minister menden metoktsütsü" ta pai ashi.

Brihostibarnü nisung 3 tepsetba den nisung 5 yiruba sülen Biren Singh-i Chief Minister menden nungi anentsü akok ta Hokolbarne nungi osang kar adoka prokshi.

CM Biren-i resignation letter ka zülü saka pa pusemertemi ibaji shisaa endokdaktüsü ta osang angazüker.

Tanü anügang lanur aser tetsür noklang aika tola tanak semer CM Biren Singh'er ki jakdang adenshi aser pa dang Chief Minister menden nungi manentsü takhangba agütsü.

Iba ya matalokdang CM Biren

Singh indang convoy Raj Bhavan leni aotsü lia lungkak aiter aikati noktanga liasü. Ajisüaka tetsür lennir kar CM Biren'er kidang nungi alu aser telok dang Biren-i CM menden metoktsütsü nangzükogo ta osang ashiba sülen telokji senshi.

"Iba ama tongtipang mapang ka nung Biren Singh sorkar ya tashi itta alitsüla aser ozüng alema inyakerem azüoktsüla" ta tetsür lennir Kshetrimayum Shanti-i osangbener dang ashi.

Brihostibarnü Kangpokpi district nung sepaitem aser lungkak aiter tsünga khatpepdang nisung 3 süogo. Iba lendong nung yirur ka Hokolbarnü asü ta ketdangsurtemi ashi.

Yashi lungkak aitertemi Haraothel yimtsüng nung injang khatok aser idangji security forces-ia tensa azüoktsü atema kanga dang kümdanga mapa inyaker, ta Army-i metetdaktüsü.

NTPRDAO-i MLA 60 ki rongdoktsütsü

Dimapur, June 30, 2023 (Agencies): 14 buba Nagaland Legislative Assembly (NLA)-i Uniform Civil Code (UCC) pusema bill meyanglutsü atema Nagaland Transparency, Public Rights Advocacy & Direct Action Org. (NTPRDAO)-i tekümdangtsü osang ka metetdaktüsügo.

Nagaland Legislative Assembly-i UCC pusema bill ka

danga yanglura onoki MLA 60 prong indang official quarters nungpoka atutsü aser mi agi rongdoktsütsü, ta NTPRDAO-i June 29, 2023 nü züluba shidi ka social media nung kanga prokshir.

NTPRDAO ta ajaba telok ya May 31, 2023 nü Dimapur nung tenteta liasü. Parnok indang nükjidongji 'Nagaland For Better Living' lir.

Manipur nunger den tejashi lemsateper: Rahul Gandhi



June 30, 2023 nü Congress lennir Rahul Gandhi Moirang nung relief camp ka semdangdang agiba noksa angur.

Imphal, June 30, 2023 (Agencies): Congress lennir tejen Rahul Gandhi-i anogo ananü atema Manipur semdangba tembangogo.

"Ni Manipur nunger den tejashi lemsateper" ta Rahul-i Manipur Governor Anusuiya Ukey den ajurutepeba sülen ashi.

"Iba ya lendong tuluka lir. Manipur nunger atema dang masü saka India nunger ajak atema iba ya tejashitsü aser temulung raksatsü tatalokba ka lir" ta pai metetdaktüsü.

Rahul-i anogo ananü Manipur nung amongdang tesem balala nung lapoka aliba relief camp sema senzü. "Ni relief camps-ia kin ajak nungi nübotem den ajurutepogo" ta pai ashi.

"Relief camps nung mozü peria mali. Ni sorkar dang relief camps nung basic amenities tajungba kümdaktsütsü mepishir. Chiyungtsü tajung agütsütsü aser mozütem yoktsüla. Kü den item khuret lemsatepogo" ta Rahul Gandhi-i ashi.

"Ni Manipur nung alir ajak

dang asenoki yimjung aginür ta mepishir. Ozüng alema inyaksangshiba ajanga tajung kecha madoktsü. Yimjung ajanga dang tejakleni aotsü aser nisung ajaki yimjung indang jembitsüla aser yimjung alitsü atema merangteptsüla. Manipur nung yimjung bener arutsü atema ni akokba tashi yariteptsü" ta paisa metetdaktüsü.

Hokolbarnü Rahul Gandhi-i Imphal nung civil society organisations (CSOs) aika den ajurutepeba liasü.

Pai Coordination Committee on Manipur Integrity (CoCoMI), United Naga Council (UNC), Scheduled Tribe Demand Committee (STDC) nungi teshimtet nübotem den ajurutepe.

Paisa Raj Bhawan nung Manipur governor Anusuiya Ukey den ajurutepe aser security tensa indang onük lemsatepe.

Hokolbarnü Rahul-i Bishnupur district kübok Moirang nung relief camps ana semdang aser idakji jenoka alirtem den sensaksem.

Paisa INA war memorial semdang aser 1944 küm Netaji Subhas Chandra Bose o nüjiso atema rararitemi linük wako atsüketer nem tetushi agüja narojung ka yutsü.

Western Sumi Hoho-i Foothill Road atema rongshir

Dimapur, June 30, 2023 (TYO): Nagaland Foothill Road metembangba atema tebilemstü abener aser Nagaland sorkar dang September 22, 2022 nü Assembly nung bangzüngtepeba ama mapa inyaktü mepishir ta Western Sumi Hoho (WSH)-i metetdaktüsügo.

North Eastern Council (NEC)

kübok foothill road road project atema senotsü teyari agütsütsüla. Küm 40 shi sülen 2013 nungi People's Road ta ajaba 'Nagaland Foothill Road' maparen tenzükshi. Iba tongtipang lenmang ajanga kin kar dang masü saka kin ajak ajangzüktsü aser rongsenketzüng renloktsü, ta WSH-i sangdong ka nung ashi.

Tangbo iba lenmang dang Trans-Nagaland Expressway ta ajar saka iba ya merenemba agi Assam ajanga senzütsüsa akümer aser iba nung timtem aika ajurur. Anungji state sorkar dang iba lokti maparen nung temulung agütsütsü aser tekaraba nung lenmang yangluzüktsü mepishir, ta Western Sumi Hoho-isa metetdaktüsü.

Nagaland nung 10BedICU atema nurse 38 shimok

Kohima, June 30, 2023 (TYO): Nagaland nung 10BedICU atema nurse 38 shimokba sentong ka Hokolbarnü Naga Hospital Authority Kohima (NHAK) nung agiogo.

Iba ya districts hospital 12 nung eGov Foundation mapatong ka lir.

NHAK nung aliba Tele-ICU ajanga specialist doctors-i meta talang pilar aliba tesemtem nung shirangertem yaritsü atema iba mapatong tenzükter.

"Covid wara marudang Nagaland sorkar aser nija mozü kitem nung ICU jenjang kanga mejungi liasü" ta Commissioner & Secretary Health and Family Welfare, Y Kikheto Sema-i ashi.

"Saka tanübo 10BedICU eGov Foundation ajanga Nagaland nung ICU facilities kanga junga lir. Nagaland nung alirtem nem sempet tajungtibatem rongnung 10Bed

ICU hubs ya ka lir" ta pai ashi.

"Vinod Khosla, Nandan Nilekani, Srikanth Nadhamuni aser eGov Foundation Director Bisoya Loitongbam-i anir telok dang Nagaland tenüng nung pelaba metetdaktüsür" ta Kikheto-isa ashi.

Parnoki Rs 32 Crore tema alangba osettem tenlaogo, ta paisa shisem.

10Bed ICU ya Chief Neiphui Rio-i January 6, 2023 nü tenzükja liasü.

"Tetenzüklenbo electricity, internet network aser nübo (nurses) indang khurettem liasü. Ajisüaka, district hospital 8 nung high speed internet connectivity enokogo aser department-i tanüngba district 3- Mon, Noklak o Peren nung enoktsü mapa inyakdar" ta paisa ashi.

Nagaland nung iba mapatong inyaka aotsü atema 10BedICU e-Gov-i nurse 40 tashi küm asem remuneration sen agütsütsü

nangzükba atema pelar, ta Kikheto-isa metetdaktüsü.

10Bed ICU tenzükba sülen tang tashi nung shiranger 212 tashi 10Bed ICUs nung anioka anepaluogo.

"Tanü putu indang ICU equipment amshitsüsa maongka anguba ya nenok (nurse) kanga tia taka lir aser iba ajanga nenok kanga ajangzüktsü. Nenok ya shirangertem anepalutsü atema kotak tenyartem lir" ta Kikheto-isa metetdaktüsü.

"Asen state aser talisa Chief Minister Neiphui Rio aser Health & Family Welfare Minister, P. Paiwang Konyak nati senso ajak nem jenjang dalang agi health care agütsütsü taginüba lir aser department-i iba alizüngji atongtsü" ta paisa ashi.

Iba sentong nung 10Bed ICU eGov Foundation Director Bisoya Loitongbam-ia o tatsüka jembii.

Ao Senden o ASLB na telongjem mensem aka



Ao Senden o ASLB na telongjem senden ka June 30, 2023 nü amendang tangokba noksa nung angur.

Mokokchung, Aami/June 30 (TYO): Ao Senden aser Ao Senden Literature Board (ASLB) na telongjem mensem ka June 30, 2023 nü Aor Kilem nung amen.

Iba senden nung Ao Senden tir, Chubawati Lcr; tatong tir I. Imkong Jamir; tongror luden züngsem Meyizülü Ozükum; ASLB mendenpuba Dr. L. Temjen Jamir; ASLB tezüluba I. Temjen Tzüdir; ASLB kimen Y. Lanutemjen; ASLB züngsem S. Wati Ozükum; Watsü Mungdang tir Arenla Longkumer; Ao Kaketshir Mungdang tir Lanutoshi Aier, parnoki shilem agia tepela o den tayongzükkba o balala bener arua lemsatep.

Iba senden nung tejembir

balalai Ao kaketkeno aser oshioben wadang den tarutsü inyaka aotsü nukla balala lemsatep. Ao Senden-i nungloksüba ama, Ao Senden Literature Board-i 2006 nungi timtem jenti ajangshia Ao oshi rendaktsüba mapatong balala inyakba asoshi pelaba Ao Senden ketdangpuri metetdaksü.

Joko Ao Senden Literature Board (ASLB) ya maliasü, kechiaser ASLB melena Ao Senden-i yakta "Ao Riju" (Ao Academy) ta sür ka tenzüksü aser iba "Ao Riju" jagi dang Ao oshioben aser kaketkeno wadang balala inyaka aotsü sentong lir aser iba rijuji Ao Senden kübok inyaksangshia aoba tentet ka asütsü, ta Ao

Senden ketdangpurtemi metetdaksü.

"Ao Riju" tenzüksüba ya yakta nungi nukla-a jembia arur, iba ya kodang tenzükdir, iba ajanga Ao kin kaketkeno aser oshioben tsütsü terenlok akatsü imlar, ta Ao Senden ketdangpurisa shisem.

"Ao Riju" kodang mapa küma odir, teinyaktsü aika adoktsü, anungji, nübu nungdakba mapang ajaki menungnangi nungita yariteptsü asoshi Ao Senden ketdangpurisa mepishia metetdaksü.

Ao Senden-isa Ao Senden Literature Board (ASLB) ketdangpur aser züngsemtem nem pelar ta tamaisü sayua mulungsüba kulikaket kaka agi senpettsü.

Changtongya nung Career Guidance seminar ayongzük

Dimapur, Aami/June 30 (TYO): Changtongya Educatonal Development Trust (CEDT) ajanga Changtongya Kaketshir Telongjem (CKT) den lungjemer June 30, 2023 nü Nüngshi Reju, Changtongya nung "Skill Development, Coding & Career Guidance" indang seminar ka ayongzüka liasü.

Iba seminar ya session asem lemsar agi aser iba mapang shisalen sayur temi subject matter indang kanga jangja rateta ashi aser nisung shiai omen ka-ka nung rangloker jembia liasü. Iba senden nung Class 7 nungi tema kaketshir tem dena liasü.

Kohima nung amenoka

aliba IT Service Provider & Software Developer Company, NK Square Infotech Private Limited nung Project Manager, Er. Bendangakum Jamir-i "Coding" indang jembidang computer inyakyim, software programming aser computer oshi nung rangloker jembia liasü.

Paisa Software Development Life Cycle, crucial use aser computer codes aser program tem asangsang nung amshiba indanga pai rasaa ashi.

Er Jamir-i item application amshitsü tongtipang sapangtem, coding indang nukla, tatishitsü agi web development, mobile app aser


game development, Artificial Intelligence and Machine Learning, Internet of Things (IOT), Robotics amala nung amshiba indang jembia liasü.

Er T Imlisunep Ao, Principal, Industrial Training Institute ajanga "Skill Development" onük nung jembidang skills yangerba aser tasosang nungi keter asoba skills tem jangjatetsü indang ashi.

Mapa inyaktsü sempet mendeni education kijai aiben takoksa jenjang nung yutsür, ta pai ashi.

Pai pei lima meimtsü aser pei aliba tesem nung anguba rongsen tem amshi ashitsü indang jembia.

(Maneni tapak 8 nung...)



Tangari linük nung temerüktiba tesem ta jembiba lima Mokokchung nung Inter State Bus Terminus ki, kima aser metsümeshitak menenmenakba yagibo samanirtem mongjen memesük angur. Koba tesem nung südirsüaka ISBT ama tesem ya raliwalirtem oliora nung anendak aser apusodak, anungji parnoki kechi angu iba kuliji pei alidaki bener o jembir. Bus ticket ayokba nungi anogo shia 1% danga bendena yur ki sentsü ya topur jungjunga temeketa dena topur ajungtsüsa atep nungbo ta bilemer. Ano, ISBT nung inyakeritemi metsümeshitak tzü, baltin aser marok shitak yutsür anogo shia chemical dena amshia merüktsüla. ISBT ya bus anendak dang masü Mokokchung tejak aser terbang lir. (TYO).

All ward union Mkg town ajanga metetdaksür

Mokokchung, June 30 (TYO): Social media balala nung PDS (Public Distribution System) jang nung plastic dena lir ta jembiba ngua All Ward Union Mokokchung Town (AWUMT) ajanga 30th June, 2023 nü Asst. Director, Food & Civil Supplies, Mokokchung ajurua iba dak sentakba nung jangjashia liasü aser pai ashiba agi iba ya plastic masü jang, koba dang 'fortified rice' ta ajar, ibaji 15th Aug, 2021, 75th Indian Independence day anogo Prime Minister ajanga 2024 tashi nung India lima tesem ajak ayimjema lemshitsü sangdongba ama agütsür, ta AMUMT, tir aser tongti zülur, Limanungsang aser Jongpongtemjen nati yokba

sangdong ka ajanga jangjatsüogo.

'Fortified rice' ya jang menünger iba nung iron, folic acid aser vitamin-tem meyokteper jang mesüka yanglur aser normal jang noklang shilem nung iba fortified rice shilem ka inoksema meyokteper Public Distribution System ajanga lemshir. Iba fortified rice achiba/chiyungba ajanga temang nung timtem masü teyari dang agütsür, anungji, nüburtemi iba ya meteta meratai chiyungtsüla, ta Mokokchung food and civil supplies ketdangsur ajanga ashiba nübur ajak den lemsateper, ta AWUMT sangdong nungsa metetdaksü.

Kohima nungi Mokokchung tashi NST Bus service tanaben tenzüksü

Dimapur, Aami/June 30 (TYO): Kohima-Mokokchung NST Day Service ya July 5, 2023 nü nungi tanaben senzütsü, ta Asst. General Manager, Nagaland State Transport, Metsiviko Meyase ajanga sangdong ka nung metetdaksü.

Bus ya Kohima nung aliba NST Bus Station, Main town

Kohima (Opp. Multi-level Parking) nungi Hombar, Bodhbar aser Hokulbar anepdang 6:30 nung apusotsü.

Kasaji Mokokchung nungia Mongulbar, Brehostibar aser Honibar anepdang kasa mapang ISBT Mokokchung nungi apusotsü, ta sangdong ajanga ashi.

Kohima nung 'Beti Bachao Beti Padhao' tenzükgogo

Dimapur, Aami/June 30 (TYO): 'Beti Bachao Beti Padhao' semzükkba sentong ka Kohima District Administration ajanga Chief Medical Officer, District Welfare Officer aser District Legal Service Authority den lungjemer New Market, Panchayat Hall nung June 30, 2023 nü agia liasü.

Deputy Commissioner, Kohima, Shanavas. C IAS ajanga iba sentong nung jembidang, ozüng tsütsü aser temang anema aliba tsütsü tetsür chanu temeden indang angatetdaksütsü nukjidong nung iba sentong ya ayongzük, ta ashi.

Pai shilem agirtem dang iba sentong nung temolung agüja adentsü aser temolung ulushir khuret lemsateptsü ajungshia liasü.

Deputy Commissioner, Kohima, Shanavas ajanga ashiba agi 'Save the Girl Child, Educate Her' sentong ya 'gender violence', tetsür chanu

temeden, tetsür chanu atema scheme balala agütsüba, POCSO Act, FIR benokba, sexual health, menstrual health aser mental health onük nungi lir.

Tetsür-tebur shima raksa indokba mesüra tepok nun glia indokba ajanga India nunga state kar nung tebur dang nungi tetsür tajemba asor, aser iba scheme ya gender discrimination aser tetsür temeden wazüka ayutsü nukjidong nung nüburtem angatetdaksütsü asoshi lir, ta pai ashi.

Iba sentong nung shisalen sayur ya Counsellor, One stop center, Kohima, Medochuiinuo Chielie, Advocate cum Panel lawyer KDLA Keduvi Zhotso aser MO Zadima PHC, Dr. Dangtila Sangtam nungertem liasü. Iba sentong tenzüka Puchosel Tetseo-i sarasadem aser SDO (Civil) Kohima, Nockpai Konyak (NCS) menden liasü.

Indian Navy nung musician ama Agniveer atema application meshir

Dimapur, Aami/June 30 (TYO): Kibong makum tebur aser tetsür November 1, 2002 aser April 30, 2006 tsüngta asor Agniveer (MR Musician) Batch 02/2023 ama züngoktsü atema Indian Navy ajanga application meshir.

Government of India ajanga latetja aliba ama temsüa

alirtemi application ya June 26, 2023 nungi agütsütetsü aser July 2, 2023 tashi alitsü.

Application ya online nung dang agütsütsü aser iba atema tejangja metetner temi www.joinindiannavy.gov.in aser Employment News dated June 24, 2023 adok nung angutsü.

GOVERNMENT OF NAGALAND
OFFICE OF THE LABOUR COMMISSIONER
NAGALAND : KOHIMA
New Capital Complex

No.LBR-305/91(Vol-I)

//

Dated Kohima, the th June, 2023.

POST ADVERTISEMENT

PRESIDING OFFICER LABOUR COURT, DIMAPUR : 1 POST (in the rank of Joint Director);
in the Pay Band PB-3: Rs.15600-39100 with Grade Pay Rs.7600.

Minimum Qualification : A person shall not be qualified for appointment as the presiding officer unless:

- a) He/She is, or has been, a Judge of a High Court: or
- b) He/She has, for a period of not less than three years, been a District Judge or an Additional District Judge: or
- c) He/She has held any judicial office in India for not less than seven years: or
- d) He/She has been the Presiding Officer of a Labour Court constituted under any Provincial Act or State Act for not less than five years.
- e) He/She should be an independent person.
- f) He/She should not have completed 65 years of age as on **31st March 2023.**

Applications are invited from individuals who qualify in any of the above listed qualifications from Sl.No. (a) to (d), and also qualify in Sl.No. (e) & (f). The application should contain detail resume supported by relevant documents including contact member, which may be submitted **on or before 31st Oct. 2023** to the following address:

Sd/-
(Er. S. L. WATI AIER)
Labour Commissioner
Nagaland, Kohima.



June 30, 2023 nü Delhi University küm noklangka Jubilee mong tatembangbuba sentong nung Ato kilonser Narendra Modi, Union Minister for Education, Dharmendra Pradhan aser University of Delhi Vice-Chancellor, Yogesh Singh nung tangokba noksa nung angur.

Party 21-i Rahul PM kümdaktsütsü asalentong yanglur: Amit Shah

New Delhi, Aami/June 30 (Agencies): Opposition party tem aija Hokolbarnü Union Home Minister, Amit Shah-i, Congress lenir Rahul Gandhi Ato kilonser kümdaktsütsü nükjidadong nung party 21 longjema asalentong yanglur, ta metetdaktsü.

Shah-isa, item party kati danga Ato kilonser Narendra Modi-i aniba sorkar anema ochimashi ken o ka danga mebenoktetter, ta ashi.

Rahul Gandhi Ato kilonser kümra India tarutsü tiaji ochimashi asütsü, ta pai ashi.

Rajasthan kübok Udaipur nung lokti senden ka nung jembidang Union Home Minister Shah-i, "Item party 21 ji ochimashi lakh 21 inyakertem lir, Rahul Ato kilonser kümdaktsütsü nükjidadong nung

Shah-isa, opposition lenirtem aikati pei jabaso aser chirnute nem jenjang tajung agütsütsü meranger- Sonia Gandhi-i lar jabaso Rahul Gandhi Ato kilonser kümdaktsüner, Lalu Prasad Yadav-i par jabaso

Tejashwi Ato kilonser kümdaktsüner, Mamata Banerjee-i par kinünger Abhishek menden ajungkettsüner, MK Stalin-i par jabaso, Udhayanidhi chief minister kümdaktsüner aser Ashok Gehlot-i par jabaso Vaibhav nem menden tajung ajangzükdaktsüner, ta ashi.

Paisa, 2024 küm election nung BJP-i takok tulu nguteta sorkar akümtsü; menden 300 dak tema ngua Narendra Modi maneni Ato kilonser akümtsü, ta ashi.

AAP sorkari Delhi Ordinance anema Supreme Court nung ken o benok

New Delhi, June 30 (Agencies): Delhi nung AAP sorkari Government of National Capital Territory of Delhi (Amendment) Ordinance, 2023 anema Supreme Court nung ken o benokogo.

Government of NCT of Delhi (GNCTD) nung sorkar ketdangsertem madak GNCTD nem agüja aliba tashiji Lt Governor (LG) nem agütsütsü. India linük temzüng meyanglushii, talisa linük temzüng kübok Arrla 239AA meyanglushii nüburtemi shimtetba sorkar nem agüja aliba tashi agentsü atema inyakertem, ta temepishiba nungji shia lir.

Delhi sorkarisa, "Linük temzüng kübok Arrla 239AA(6) nung ajemdaker NCTD nung ketdangsertem posting atema tashiji nüburtemi shimtetba sorkar nem agütsütsüla," ta ashi.

AAP-i, Delhi Ordinance ya Arrla 239AA nung NCTD atema shia aliba federal, democratic yimsüsüba anema lir aser iba ya meshisadangi benokba lir, ta metetdaktsü.

AAP sorkari temepishiba ken oji advocates- Shadan Farasat aser Hrishika Jain na ajanga agütsü. "Delhi ordinance ajanga

Balasore nung train lendong nung asür 52 maitsubo mejangjar

New Delhi, June 30 (Agencies): Tawa Odisha kübok Balasore district nung train lendong nung asürtem tasü mang 52 bo tang tashi maitsubo mejangjateter.

All India Institute of Medical Sciences (AIIMS), Bhubaneswar nung tasü mang 81 DNA test agiba nungi samples 29 bo maitsubo jangjateta asür kinüngertem nem osang metetdaktsüogo, ta Bhubaneswar Municipal Corporation nung Mayor, Sulochna Das-i metetdaktsü.

Das-isa, tasü mang pongubo kinüngertem nem agütsüogo aser maneni tanüngba tasü mangtem agütsütsü atema inyakdar, ta metetdaktsü.

State sorkar tetuyuba nung ajemdaker BMC-i tasü mangtemji tsüngdong bener oa kinüngertem ket nung agütsür, ano kinüngertemi tasü mangtemji parnok aliba tesemi bener aotsü memelungra BMC-i Bhubaneswar nung aliba tesem ana nung tasü mangji rongdoktsür.

June 2 aonung 7:00 ako meta Coromandel Express, Shalimar Express aser khu abenba train tsüktepa lendong nung nisung 291 asü aser nisung 1,000 dak tema yirua liasü.

Iba lendong atalokba sülen iba tatalokba bushisüngdangtsü

atema CBI nem nunglokja liasü. Train lendong atalokba indang CRS report bo agütsüogo, ajisüaka CBI-i iba tatalokba kuli bushisüngdangba maparem ano tang tashi metembang, anungji CRS report ji nüburttem dang mesangdongtsü, ta Railway ketdangser kati metetdaktsü.

Osang tejangjabo masü, ajisüaka Commission of Railway Safety (CRS) indang report nungji, Signalling & Telecom Department aser Traffic Department nung inyakertemi aibelenba ajanga iba lendong atalok ta shia lir.

Ketdangsertem jagi standard operating procedure (SOP) junga mebensi, ta osang angazüker.

Ajisüaka Railways nung tongti ketdangser katibo, "Onoki CRS report indang kecha memetetdaktsütsü, kechiyong CBI-i iba tatalokba bushisüngdangdar. Onoki report anapronglaji asadanga medemdangba sülen maneni nüngdakba mera agia inyaktsü," ta metetdaktsü.

Train lendong atalokba kuli ya South Eastern Circle CRS, AM Chowdhary-ia bushisüngdanga liasü, aser Brihostibarnü pai Railway Board ket nung pai renemba report agütsüogo.

PAN-Aadhaar link asüba tembangaogo; joko mapang matsülangtsü

New Delhi, June 30 (Agencies): PAN Card aser Aadhaar sendakteptsü atema tatembangbuba anogoji June 30, 2023 liasü; taoba mapangtem nung Aadhaar-PAN sendakteptsü atema mapang aiben atsülangja liasü, ajisüaka joko matsülangtsü.

PAN-Aadhaar sendakteptsü atema tatemsabuba anogo atsülangtsü sangdongbaji taküm April ita nung liasü. Iba mapang nungji Income Tax Department-i, PAN card holders-i June 30 anogo tashi nung PAN card aser Aadhaar sendakteptsü akok, ta metetdakja liasü.

June 30 nü tatembangbuba anogo asü nung nisung aikati

aritepa Income Tax e-filing website lapoka iba maparen inyakogo.

June 30 tashi nung Permanent Account Number (PAN) aser Aadhaar link masürtem indang PAN cards ji July 1 nungibo tagitsü mali akümtsüa akok, ta osang angazüker.

Income tax website nung shia aliba agi, PAN aser Aadhaar link mesüra takoksa balala angutsü; item rongnung, saru mesüra tangutsü aliba refund nai mangutsü, item ama refund nung sen tetemok mangutsü, Income Tax rules kübok saru rate teimba katitsü aser tax collectable at source (TCS) rate teimba asütsü.



June 30, 2023 nü New Delhi nung Lt. Governor of Delhi, Vinai Kumar Saxena-i Delhi sorkar department balala nung mapa shimokba appointment letters lema agütsüdang tangokba noksa nung angur.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

CHITENI 01, 2023

Doctor-tem Anogomong

- Tangsen Lemtur

Meimchirtem tashidak balala anepja taküm kümzükba maparen nung doctor temi tongtibang shilem agiba atema doctor tem nem tetushi agütsütsü asoshi India nung küm shia July 1 anogo nung National Doctors' Day amonger. Iba anogomong nung linük tesem balala nung sentong aika ayongzuka doctor tem nem tetushi agütsür aser pelaba lemsateper. Iba dak alia iba anogomong nungsa medical organizations, hospitals aser healthcare institutions-i seminars, lokti senden aser workshops ayongzuka medical tsütsü terenlok jenjang asadanga den külemi shisa lemsateper. India nung kanga nungtugu doctor, Dr. Bidhan Chandra Roy asoba anogomong aser asüba anogomong nung National Doctors Day ya amonger. Dr Bidhan Chandra Roy ya 1882 küm July 1 anogo nung aso aser 1962 küm July 1 anogo nungsa asü. Pa ya West Bengal nung Chief Minister tanabuba inyaka liasü. Pa ya medical doctor tajung ka dang masü saka mangdang tulu aliba yimtenren lenir ka liasü. Taküm atema National Doctors' Day omenji 'Tayongzükba koktetba aser taneptsüba tekatem' lir. Coronavirus wara mapang nung doctor temi kanga meranga inyakba atema parnok nem tetushi agütsütsü nükjidong nung iba omen ya shim. Asenok aikati doctor tem ya tanabuba Tsüngrem ama züngshir, kechiyong doctor temi joko teimla ajak samar aliba shirangertem-a aneptsür. Khen bilemstü agibo anogo shia mozü kidang tashidak balala agi shirangertem teka agi kongshia anepalutsüji mapa temelabo masü, kechiyong iba nungji timtem aser anibelem kanga lir; talisa shirangertem anepaludang tashidak balala menazüktsüsa lir. Ajisüaka jungjunga shisadanga doctor tem mapaji jangratemtsüka aser tenükshitsüka lir, kechiyong shirangertemi taneptsü angutsü teimla tulu nung doctor bushir aser doctor temi parnok tazüngba shisatsü den külemi Tsüngremi agütsüba sempet amshia shirangertem aneptsübaji tesüngmangtsüka lir aser iba nungji temoatsü den tepela-a lir. Ano külen reprangdanga doctor karibo shirangertem treatment agiba atema shirangertem dang nungi sen tali meshir. Bihar yimtiba, Patna nung aliba doctor katibo Amongnü shia yimdaklirtem angati temang tendangtsüba den mozü angati agüja arudar. AIIMS, Patna nung Dr. Raman Kishore-i angati health camp ayongzuka katsüba den külemi mozü angati agütsür, aser iba atemaji pai ita shia pa itasen nungi shilem 70-80 indoker. Pai tangar dang nungi alakteta temeim mapa inyakba otsüji kar atemabo tatishitsü tajung asütsü. Asen state sasep nunga iba anogomong nung nüburtemi doctor tem nem tetushi agütsütsü kanga tetemsü. WHO-i nütsüng 1,000 shia atema doctor kakabosa alitsü tuyur, ajisüaka Nagaland nungbo nütsüng 1,000 shia atema doctor tesadang (tetezü nütsüng 2,000 shia doctor 1) dang lir. Nütsüng sasep nung doctor tem peria alitsüji kanga tongtibang asütsü. Nütsüng sasep nung doctor tem ajema alibaji akhi mapang nungbo kecha balaka masütsüa akok, saka wara tulu agi kongshiba mapang nungbo nisung jenti mekümzükleti süadoktsü. Doctor tem ajaki chichia pei wadang angateta inyakra nüburtem kanga anisüngzüktsü.

OLEMSABANG

Temelenshi adokdaksüba lenisüba: Mosa taküm aser lenisüba nungi tangazüktsü kar

Temsüyanger, CTC (Source:- Mitkar)

(Yashi adok nungi)

Mosa Lenisüba nungi Tangazüktsü Kar:

1. Mapang aben nüburtem den jembia tongtepratepa litetba lenir ka Mosa liasü.

Mapang aben Mosai nüburtem den jembiba asenoki Laishiba nung angur; "...Israel chir ajak dang Mosai jembiba o itemi lir" (Tazüng. 1:1), "Yordan anüdoklen Moab lima nung Mosai iba ozüng ya rasaa ashi" (Tazüng. 1:5), "Nüburtem dang mela-ang..." (Tazüng. 2:5), "Mosai kechi mela aji Israel nüburtemi inyak..." (Ani 12:35), "Mosa o Aron na dang Kibubai melaba ajak Israel nungertemi tashi anga inyak" (Ani. 12:50), "Anungji Israel chirtem dang shiang, "Ni Kibuba lir, ni nenok Ijip nunger alar tia nungi anitetsü, aser parnok alar akümba tia nungi ni nenok kümzüktsü. Ni kü teka songtoka aser obendanga tulu agi nenok alangzüktsü. Nenok kü nüburt asütsü asü ni nenok Tsüngrem asütsü. Aser kodang ni nenok Ijip alar tia nungi anitetdir idangji nenokini Kibuba, nenok Tsüngrem ta metettsü" (Ani. 6:6-7). Tsüngrem aser nüburtem tsüngda tenyar ka ama Tsüngremer tatalokbatem aser sentongtem ajunga pai nüburtem dang ashi, pa asoshi kecha nüburtem nungi miima mayu. Nüburtemi Kibuba tsübu, Pa dak amang, aser Pa lar Mosa dak amang (Ani. 14:30).

Pei mapa nung asüyonga mesüra yimsüsüba nung asüyonga kodang chichiba aser otia jembitepba melilir, kati ka tsüngda tesendaktep raksar, aser telemtetba tai agir. Lenirtem shirnok dak teratatsü taküm lir parnok dak nüburtemi temulung malemer, kechiaser parnoki langka miima lir ta teti nüburtemi bilemer. Saka lenirtem aikati nüburtem dang ototia mejembii karbo pa/la asoshi ayu nung dang nüburtem dak tashi lir ta bilemer. Tanü iba ama lenirtem aika lir. Talisa alimar yimsüsüba len kodang shisadangdir mapang nüburtemi shimtetba lenirtem aika pei nüburtemi election mapang shiteterbo pei nüburtem majurudanga lenirtem aika lir.

2. **Nüburtem Den Teti Sendaktepa Nüburtem Teti Ajungmesoba Lenir Ka Mosa Liasü**

Mosai nüburtem dang angatsü asoshi nongnanga maliasü. Nüburtemi asüngdangbatem pai angashi, pai shisadang, aser kechi tajung aji pai agizük (Tazüng. 1:22-23). Anungji maneni nüburtem aser Mosa tsüngda tesendaktep tajung liasü. Pai nüburtem dang anga, angashi, aser parnok den maneni jembia. Nüburtem dang angadangerang pai telemtetbatem agi.

3. **Ozüngsüba Tajung Mosai Yangertetta Nüburtem Asoshi Yutsü:**

"Idangji ni nenok obendangertem dang ni shiogo, 'Nenok adianutem tsüngda nung o angang aser nisung kati pei adianu den süshia mesüra pa den aliba bendanger kar den süshia ochi shia o bendangang. O bendang kecha nunga tejak tereprang, tulu aser tila ajak dang kasa angang. Nenoki nisung baji Tsüngrem meyong lir. Nenok asoshi o tasakji kü dangi bener arung aser aji ni angatsü. Iba mapang nung nenoki kechisa inyaksü item ajak indang ni nenok dang shiogo" (Tazüng. 1:16-18). Kanga dang tongmelang saka shirnoki iba tetuyuba angatsü mulunga liasü parnok asoshi terajem liasü." Nenok asoshi tanishirtem aser obendangertem nenok kin shia nungi yimti shia shimtsüla, aser parnoki Kibuba ne Tsüngremi nenok nem agütsütsü aliba nungji ochi agi nüburtem o bendangtsü. Nai ochi mashiba mapa meinyaksüla mesüra tejak mereprangtsüla. Nai süpokrem magitsüla, kechiaser süpokrem agi shisa takar tenük pokdaksür, aser temeshipur o meyipsatsür" (Tazüng. 16:18-19).

4. **Külemi Inyakertem (Team) aser Tongtisürtem Mosai Shimtetba:**

"Ni kü kijai nenok khu abentsü makok....anungji ni nenok kidong shia nungi tanishirtem shisa taka aser ajaki akhüm tsüba aliba nisungtem shimteta....tanishirtem yutsüogo" (Tazüng. 1:9-15). Ibai chichia telangzüba aser ochi telangzüba ka lir. Ibai ototia tesayuba aser ajemaluba ta sayur. Iba yagi Mosa pei asoshi bilemba nisung masü ta sayur. Iba yagi maneni sayur, lenir ka jagi kechi nükjidong aji metettsüla aser aji ajangzüktsü asoshi arok/külem inyakertem külem telungjem mapa kanga tongtibang ta sayur. Anungji lenir ka taküm nung pei teka nung kechi mapa lir aser kechi nükjidong aji metettsüla, aser ibaji ajangzüktsü asoshi arok/külem telungjem mapaji kangasa tongtibang. Mosa lenisüba ajanga kangasa junga külem inyakertem telungjem aser maparen ajangzükttet.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

St. Thomas Day anogomong sodi magütsüba agi Khristantem mepelar



Kerala nung Thrissur district kübok Palayûr nung Yisu nütsüng Toma indang kürakyanglu noksa nung angur. Chennai airport (Tamil Nadu) anasa Pa Khrista atema asü aser pa nungtem nung Chennai nung pa leper 'Santhome Basilica' yanglua lir.

Thiruvananthapuram, June 30 (Agencies): Kerala nung Khristantemi state sorkar balala dang St. Thomas Day anogomong ya public holiday sangdongang ta aiben mepishia arur, ajisiüaka sorkari takhangba magizükba atema Khristantem jashir.

1996 küm tetuyuba ka ajanga St. Thomas Day anogomong ya joko Public Holiday masütsü tuyua liasü. Iba sülen Khristantemi maneni iba ya sodi anogo sangdongang ta takhangba agüja arur.

Küm shia alima tesem ajaklen July 3 anogo nung Yisu Khristar nütsüng, Toma (St Thomas) bilemteta amonger.

Toma ya Yisu nütsüng 12 rongnung ka liasü. Aso lbuba AD nung Toma tziyim ajanga India linüki arua Kerala nung tama Khrista osangtajung proka liasü.

Brihostibarnü (June 29) Assembly of Christian Trust Services (ACTS)-i iba anogomong public holiday mesangdongba dang masü saka taküm iba anogomong (July 3) nung University tatidang lezmüktüba atema mepelaba metetdaksü.

ACTS nung General Secretary, George Sebastian-i, "India nung 1956 nungi 1996 küm tashi St Thomas Day ya public holiday liasü, ajisiüaka

1996 küm A.K. Antony (Kerala Chief Minister)-i aniba sorkari public holiday ya agien. Iba sülen onoki sorkar balala dang iba anogomong ya public holiday asütsü mepishia liasü, saka telangzüba tajung masütsür," ta metetdaksü.

Tan hopta tetenzüklen Kerala state sorkari Muslim nunger 'Eid' benjung atema Bodhbar aser Brihostibarnü shisaliok rejutem sodi asütsü sangdong aser Bodhbarnü (University) tatidang agitsü liasü saka Khristantemi St Thomas Day amongba anogo- July 3 nü ang iba tatidang agitsü metetdaksüba ajanga Khristantem mepelar.

2022 küm Germany nung Khristan million tesadangi Arogo toktsü

June 30, 2023: Yaküm Germany nung Khristan 522,821-i Arogo toktsüogo, ta June 28, 2023 nü German bishops' conference-i metetdaksü.

2021 küm nunga Khristan 359,338-i Arogo toktsü, 2020 küm Khristan 221,390-i toktsü aser 2019 küm Khristan 272,771-i Arogo tokja liasü, ta parnoki metetdaksü.

Tang Germany nung Catholic Khristan 20,937,590 lir, aser Khristantemji Germany nung nütsüng shilem 25 shi lir.

2021 küm coronavirus anema tenokdangba aliba mapang nung Amongnü tekülem sentong nung adentsü arur shilem 4.3 aliba nungi 2022 küm shilem 5.7 aküm, ta report nung shia lir.

2022 küm Germany nung nisung 155,173 baptiogo, mezüngbuba Kibuba benjung nung adener 162,506 liasü, Arogo nung kiyimba sentong 35,467 liasü aser asüpila sentong 240,144 agi, ta German bishops' conference-isa metetdaksü.

2022 küm Germany nung tebur 45 dang 'ordain' asü.

2021 küm Arogo 9,790 aliba nungi 2022 küm nungbo Arogo 9,624 dang kümogo, yamaji 2021 küm putir 12,280 aliba nungi 2022 küm putir 11,987 dang aküm, 2021 küm permanent deacon 3,253 aliba nungi 2022 küm nungbo permanent deacon 3,184 dang kümogo.

2022 küm tain 1,447-i Arogo bushi aser Arogo toktsür 3,753-i Arogo dangi tanaben meyipa aru.



N.C. Hills, Haflong kübok Mahur sub-division nung Zeme Baptist Association Assam Unit, Zeme Supportive Mission nung inyaker Ao arogo 22 teyaritep ajanga Skills Development and Training Centre ki tajung ka yanglua June 28, 2023 nü Rev. L. Yapang Mollier, Secretary, Church and Mission ABAM Impur ajanga moaja lapoktsüogo. Ao arogo 22 ajanga tenla tulu aguja ZEME nüburtem ajungkettsü mapa tulu inyaktsüogo koba ajanga Tsüngrem tali sentsüwangshidaksür. Tenla tulu agütsür arogotem dang pelaba lemsateper aser Tsüngremi arogotem iba lima nung Kibubar Mission inyaktsü tali moajang ta Rev. Dr. Mar Pongener Executive Secretary ABAM-i metetdaksü.

ANOGO ABEN TSÜNGREM DEN

Kü Timtem Bilemtettang

T. Ken 119:153-160

Nisung shingaia o bendangdaki mouner, kuli asütsü mouner. Tai aketerji koda balaka tamajungba! Saka na tetendangba nung noktakra, na asoshi bilemtsür ka lir meteta alitsü junger. Ken züluri Kibuba den jembibaji ibai lir, "Kü tepu kümang, aser ni alangzükang:

ne tenangzükba ama ni rok a asoa kümdakjangma" (t.154).

Asenok asoshi pukümer tulutibaji Tsüngrem lir. "Tsüngrem asenok den lira, shibai asenok anema arutsü?" (Rom 8:31). Hopta tsüngda asenoki timtem ajanga aotsü akok. Tangari asenok anema tiyazü osang adoktsütsü akok, jangra matemtsü tia ajurutsü akok, kechiaser asenok anemer lir. Ken ken tangari asenok mangatetba ajanga asenok anema jembitsür. Item ajakji nai tanü ajanga aotsü akok saka ne tetendangba mapang ne den Tsüngrem lir. Kodang na aser ni atitangdir, Pai bilemdanger aser asenok pu akümer.

Pai mangatettepji bentettsür. Kodang asenoki Tsüngrem dang sarasademdir aser shidir, "Kü ken o bilemdangang," Pai mapa inyaker. Pai asenok alangzükker aser kümzükker. Asenok aibelen mesüdaksür aser tepuokdak meyutsür. Tsüngremi Pa nübur taküm timtem nungi kümzükker.

Asenok teimla samadang Tsüngremi yarir. Nai timtem ajurudang, na teimla makai akümstsü akok. Saka Tsüngremi na teyimla makaba jenjang nungi ajungketer aser Pai tashi agütsür.

Tanü kotak nung Yisui na asoshi mepishitsür. Pa ji ne kotaker Temepishitsür aser ne Temaba Putir lir. Na tatidang aser temenen nungi jenbuttsü asoshi pai ne nem taochi agütsür. Saka nai temenen menara ne temepishitsür dangi nai aotsü akok. Pai ne dang tai atoktsü, merüktettsütsü aser ne ken-o nung ne pu akümstsü.

Kodang tangari na timtemdaksüdir, Tsüngremi amshidakjang. Pai na kümzüktsü aser na teimla makaba nungi temaleni ajungkettsü. Yisui na atema mepishitsütsü aser tebuai tai atoktsü.

Asia nung küm 30 Tsüngrem tenzük-sang missionary, Charbonnier süogo



Missionary, Jean Charbonnier (ajichilen) China nung nun tem den tangokba noksa nung angur.

June 30, 2023: Asia nung küm 30 shi tenzükba küm 30 shi Tsüngrem tenzükba wadang balala nung aliba sülen arusang France nunger tesüsa anisüngzükba France-i missionary, Jean Charbonnier meyipa oa liasü.

Pai China nung Khristan yimsü indang kanga junga meteta liasü aser pai kaketa aika zülu. Pai 'Guide to the Catholic Church in China' kaketa zülu aser iba kaketa nungji China nung Arogotem tia indang osangtsüsang balala keta lir. Iba kaketa ya 1986, 1989, 1993, 1997, 2000, 2004, 2008 aser 2014 kümtem nung maneni osang tasen aika inoksema adok.

Putir Charbonnier ya Paris Foreign Missions Society (MEP) nung züngsem liasü. Pa Tsüngrem tenzükba wadang nungi anisüngzükba sülen France nung Provence region kübok par yimda, Lauris nung lia June 29 nü asü.

Pa Asia kübok linük balala (Maneni tapak 8 nung...)

**AO OSHI ANGAZÜKDAK:
TANÜ ANGAZÜKTSÜBA OJANG**



Remloktsü

(adv) tenük agi atsük (wink)
* Pai la dak tenük remloktsü.

Remlu

(n) shiruru tepsetsü mapang tetsür dena tsüngsanga külemba (traditional dance of worship during killing of animals where women also take part)
* Tanü asüngbo remlu ia külemba sobaliba endokogo.

OLONG PAITEP # 6562

1		2			3			4		5
							6			
7			8							
							9			10
		11								
12										
					13					
14				15				16		
17										
								18		

TIPIEN

- 1. Lapok / Tenzük - (4)
- 6. Tarutsü indang tetzü - (4)
- 7. Yimer ajak - (7)
- 9. Ishika dang - (4)
- 11. Terongtong aser tepi tetsüngda - (7)
- 12. T ____ i - (4)
- 15. Tsürabur nungi lemzükba - (7)
- 17. Tetsür tanur dang ajaba - (4)
- 18. Shirang ajung - (4)

LANGTSÜNGLEN

- 2. Pei tasoli - (3)
- 3. Iba anogo - (4)
- 4. Telemsa ka - (6)
- 5. Maneni - (3)
- 7. Tekaratiba nung - (5)
- 8. Ki temalen - (5)
- 9. Temejung - (5)
- 10. Teimla aka - (5)
- 11. Tajatsü - (6)
- 13. Molung - (4)
- 14. Anogo semer ka - (3)
- 16. Tashi balaka - (3)

OLONG PAITEP # 6561 TELANGZÜBA

TIPIEN:

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN:

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. teronem, 12. Sempa, 13. Jahaz.

NAI-A YA METETTER MA



BLUE MOON VALLEY

China lima nung aliba Blue Moon Valley dang 'Shika Snow Mountain area' taka ajar aser iba tesem ya Shangri-La county nungi kilometer 7 shi pilar southwestern Shangri-La nung lir. Iba tesem ya sea level nungi metre 4,000 shi ajungketa tur lir aser iba tenem kolak nung jagi Meili Snow Mountain, Jade Dragon Snow Mountain, aserbo Daocheng, Sichuan nung aliba rüjep tenemtem kanga dang temenungratsüka angur.

- 1 + 1 = 6
- 2 + 5 = 7
- 3 + 4 = 9
- 6 + 8 = 8
- 7 + 9 = ?

Nai iba ongko ya inyaktettsü asu ?



Mizoram peace accord sign süteper küm 37 jungogo



June 30, 1986 nü India sorkar aser Mizo National Front (MNF) tsüngda Mizoram peace accord nung sign sütepeba angur. (file)

Aizawl, June 30, 2023

(Agencies): Mizoram nung Hokolbarnü otsüsütsü aketba Mizoram peace accord sign sür küm 37 abensaba bilemteta mongogo.

India sorkar aser Mizo National Front (MNF) tsüngda June 30, 1986 nü Mizoram nung telungpur maparen anentsü atema Mizoram peace accord nung sign sütepa liasü.

"Iba peace accord ya kanga dang tajung aser linük nung dang masü saka alima nung tatishitsü tajung ka lir" ta Mizoram chief minister Zoramthanga-i ashi.

Mizoram peace accord takok ajanga kidanger state aser linük aika atema "model of peace" ama züngshitsü akok, ta pai ashi. "Tanü ni külem Mizo nunger dang Tsüngrem dang nungi iba sempet anguba atema nüma atangtsü aser tarutsü pututem atema wazüka ayutsü ayongzükur" ta Mizoram chief minister Zoramthanga-i metetdaksü.

"Yimjung ajanga dang asenok tejakleni aotsü aser renloktsü" ta pai ashi. India sorkar den Mizoram peace accord nung sign sütepeba MNF telok ya tangbo

political party ka lir, ajisiüka iba mapang Laldenga-i MNF ya telungpur telok ka liasü aser parnoki India nungi Mizoram balaka razüka oa linük ka akümtsü atema rara.

1950s tatemlen Mizoram nung yawara tulu (Mautam) mapang sorkar nungi teyari manguba ajanga MNF telok tentet.

Küm aika olemtepa aruba sülen June 30, 1986 nü Mizoram Accord, 1986: Memorandum of Settlement ta ser document ka nung sign sütepe.

Iba MoS nung MNF tenüng nung Laldenga, India sorkar atema taoba home secretary RD Pradhan aser Mizoram sorkar atema taoba chief secretary Lalkhama nungeri sign asü.

1947 küm British Empire nungi nüjiso anguba sülen India nung takok anguba peace agreement ya iba ya lir.

"Rajiv Gandhi lenisüba kübok Mizoram Peace Accord sign sütepeba atema iba anogo amonger. Iba otsüsütsü tenangzüktep ajanga Mizoram nung yimjung aser tesünep bentsür aru" ta Congress party-ia tanü metetdaksü.

Tipra Motha-i Home Minister Amit Shah den ajuruteptsü

Agartala, June 30, 2023 (Agencies): Tipra Motha Chairman Pradyot Kishore Manikya Debbarma-i anir teshimtet telok ka New Delhi-i ogo.

Parnoki Home Minister Amit Shah den ajurutepe Tripura dak sendakba onüktem lemsateptsü atema ao.

June 29 nü Tipra Motha Chairman Pradyot-i Tripura Chief Minister Manik Saha den ajurutepe senden ka amen. Iba

mapang tenati Tripura indang politics, ketdangsubaren aser terenlok onüktem lemsatep.

"Ni chief minister den ajurutepe onük aika lemsatepogo. Kechi ataloktsü'ar repranga atadi" ta Pradyot-i ashi.

Centre sorkar den ita asem tashi Greater Tipraland tema jembia arudar saka iba indang olen mejembii atatsü, ta pai ashi. Tripura Tribal Areas Autonomous District Council

(TTAADC) nem budget lemzüksüba nung tebilemstsü kar lir aser iba ya Tripura nung lisopurtem aliba tesemtem tiptema ketdangsubaren aser renloktsü atema kanga tongtipang lir, ta paisa shisem.

Pradyot-isa taoba Chief Minister Manik Sarkar aser Chief Minister Biplab Kumar Deb na den inyaksangshia aruba aser "boycott politics" anema noktakba indang metetdaksü.

Assam nung summer vacation mapang compulsory classes magitsü

Guwahati, June 30, 2023 (TYO): Education Department-i summer vacation mapang compulsory classes agitsü tetuyuba kecha mali ta Assam Education Minister Ranaj Pegu-i metetdaksü.

"School Education mesüra Samagra Assam nungi summer vacation mapang compulsory class agitsü tetuyuba kecha

mali ta ni jangjatsür. Ajisiüka SMC/SMDC dang summer vacation mapang temulunger tesayur/staff ajanga remedial classes aser extracurricular activities agitsü metetdaksür" ta pai ashi.

Iba ajanga summer vacation mapang School Management Committees (SMC) aser School Management and

Development Committees (SMDC) ajanga remedial classes aser extracurricular activities agitsü akok saka regular classes magitsü ta jangjatsüogo.

Tesüiba nunga school aikati summer vacation mapang remedial classes aser extracurricular activities agia aruogo.



Congress lennir Rahul Gandhi-i June 30, 2023 nü Manipur nung relief camp ka nung jenoka aliba tanurtem den ajurutepdang agiba noksa angur. Rahul Gandhi-i anogo ananü atema Manipur semdang aser iba mapang pai tesem balala nung relief camps sema senzü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA**

Dt. Kohima, the th June 2023

NOTIFICATION

NO. DTE/ ESTT-2/3/2016-17/ : Prescribed application form for Diploma Course outside the State (Central pool) during 2023-24 session may be collected from the Directorate of Technical Education, Nagaland, Kohima (Below New Secretariat Complex) on payment of Rs. 200/- (Rupees two hundred only) with effect from 30-06-2023 to 15-07-2023 during all working days. The form can also be downloaded from the website www.dtenagaland.org.in and the fees should be paid while submitting the form printed in white paper (A4 size).

The last date for receiving the complete forms by hand is 15th July 2023 after which no request will be entertained.

Sl.No	Name of Course	Eligibility
1.	Diploma Pharmacy	10 + 2 Science with Biology
2.	Electronics & Communication	HSLC Passed with 40% in Maths and Science together for ST candidate and 50% for General Candidate
3.	Mining Engineering	
4.	Automobile Engineering	
5.	Electrical & Electronics	
6.	Computer Aided Costume Design & Dress Making (For Girls only)	
7.	Architecture Assistantship (For Girls only)	
8.	Electronics & Telecommunication	
9.	Printing Technology	

Note: Interested candidates can also apply for Diploma Course Outside the State (North East) as there are some vacant seats available.

(Er. VIPULHOU LHOUNGU)
Director

MULUNGEN O

Onoki teti meima aliba Ojala, **Wt. Chubamongla** (D/o Lt. Sakumeri, Mongsenyimti), la shirangba anogo nungi tenzuka lai iba akumli toktsur aoba anogo tashi nung ana aser talang nungi kija-kibong aser lokti balalai nubo, rongsen, shisatsü aser sarasadem agi onok yaria ozü mulong zürep lemsatepogo, nenok ajak dangi ozüi tsungdong arua pelaba melemsatet nung iba osangkaket ajanga nenok ajak dang kangasa pelara, ta lemsateper.

Nenok temeim mapa yari ozüi kecha meyipa magütsüteter, saka takoksang Tsungremi nenok kija kibong aser lokti ajak mojangma, ta sarasademtsür.

- **Temeim Chirmur & Semchirtem**



ASO : 17/05/1930
ASÜ : 22/06/2023

DRIVER KA NUNGDAKER

Dimapur nung gari anishitsü atema Lengrijan, DC Court area, Aokong, Duncan & Mon Basti nung alir nubu ka nungdaker.

Itasen - Rs 8,500/-

Tejangrartemi iba nungber ajanga tongtepratepang : 7005083159

Philippines nung osangbener anema azüdokshiba manener

Manila, Aami/June 30 (Agencies): Manila nung

atsüka atar amakdang nisung pongu yiruba nung osangbener ka dena lir, ta Philippine police-i Hokulbarnü ashi, aser ibai osangbener anema azüdokshia aruba rongnung tasenba alitsü.

Manila nung amenoka aliba osangkaket Remate nung atema noksa tangoker Joshua Abiad mena aliba gari ka nung prangbong bona alirtemi amakdang pa teka yiru, ta district police chief Brigadier-General Nicolas Torre-i ashi.

Abiad den par tanur aser adianu densema yirur alirtem ya Philippines yimtiba, Manila nung mozüki ka nung temang anepalur, ta Torre-i ashi.

Police temi temolung melemi aliba nisung tenung magütsü saka Torre-i Manila radio station DWPM den sensaksem akadang, ozüing alema temesepba mozü shibelenba

anema küm tenet raraba indangotsü pai bendenba dak sendaka alitsü akok ta ashi.

Abiad ya 'police beat reporter' ka lir aser temesepba mozü indang ken o kar nung pa tenük kuli lir, anungji kuli agütsüsü pa jaoka lir, ta Torre-i ashi saka court mesüra ken o tejangba pai mashi.

"Iba ama mapa tamajung ya timtem ajurua alirtem dak amakba kisüing masü saka asenoki kanga meimba osang abenba temeden aser jenjang anema lir," ta Manila police tekolakba Major-General Edgar Okubo-i sangdong ka nung ashi.

Alima nung osangbener asoshi tamajungtiba linüktem rongnung asetkong aika agi kumtetba Philippines linük ya ka lir aser osangbener tepsetba timba memerenshi yutsür.

Taoba küm osangbener asem tepsetba sülen Philippines ya Committee to Protect

Journalists indang "Impunity Index" nung jenjang tenet buba nung lir, koba ajanga osangbener tepsetba ken o mebanteteti aliba asadanger.

Manila nung osangbener dak lendong agütsüba ya kanga bolua mangyr. Linük yimtiba alema orr danga tesemtem nung radio broadcaster dak tenük yokba ajangshia lir.

Taoba tir Rodrigo Duterte-i pa indang 2016-2022 kümsük mapang temesepba mozü anema raradang sensaker timba sür nisung meyirijang aika tepseta lir.

Iba mapang meimchir anema mapa tamajung inyakba alitsü akok ta bilema international investigation tenzük.

Duterte melensang Ferdinand Marcos-ia maneni temesepba mozü anema rarar saka paibo temesepba mozü nokdangtsü aser rehabilitation nung tali temolung agütsür.

Wagner contracts tarutsü atema

Moscow, Aami/June 30 (Agencies): African linük

balala aser Wagner mercenary group tsungta contract zülitepa alibaji iba tezungzüktep yanglua aliba sorkar tem tebilemsü lir, ta Russian Foreign Minister Sergey Lavrov-i ashi.

Hokulbarnü osangbener senden ka nung jembidang, Wagner telok ya Central African Republic (CAR) aser danga linüktem nung item sorkar den indang-indanga contract zülutepba nung ajemdaker inyaka aru, ta Lavrov-i ashi.

Ano Russia indang defence ministry nungia military adviser noklang aika CAR nung mapang talangka nungi inyaka arua lir, ta pai ashi.

Ukraine rara nung kanga sashia shilem agiba Wagner mercenaries yagi taoba Honibarnü mapang tatsüka Russia sorkar anema nokdaka Russia south tsütsü Rostov-on-

Don yimti agi aser Moscow leni arudang tezungzüktep ka agia anenadok.

Iba tatalokba yagi CAR aser Africa nung danga linüktem nung Wagner zungsemtem taa yong raraba atema nüburtemi jembite zük.

Mali, kong mitkar tashi amshia 2020 aser 2021 nung yimten tashi rakzük, yangji ISIL (ISIS) aser al-Qaeda den sendaktepa aliba telungpur telok balala den küm aika rara arur. Saka yangji aliba Russian sepaitem ya Wagner mercenaries masü saka training agütsürtem lir aser Russia nungi bener aruba hadir amshitsü yangji aliba sepaitem nem training agütsür ta ashir.

Africa nung Wagner sepaitem yokba ya Africa nung tamakok ajurua aliba yimten asoshi life insurance amai lir aser timtem ang tali ajurutsü, ta France Tir Emmanuel Macron-i February ita ashi.

SCO tekolakpur senden nung China tir aser Pak ato kilonser adentsü



Beijing, Aami/June 30 (Agencies): Taruba hopta virtual yimya nung Shanghai Cooperation Organisation (SCO) Council of Heads of State Summit senden alidang China Tir Xi Jinping adentsü, ta Chinses foreign ministry ajanga Hokulbarnü ashi.

"India Ato Kilonser Narendra Modi-i jaokba ama Council of Heads of State of the Shanghai Cooperation Organization (SCO) indang senden 23 buba nung Chinese Tir Xi Jinping Beijing nungi video conference ajanga adentsü aser

July 4 nü tongtipang o jembitsü," ta Chinese foreign ministry odongtar Hua Chunying-i sangdong ka nung ashi.

Virtual yimya nung iba SCO Council of Heads of State senden ya Ato Kilonser Narendra Modi mendenpuba sür July 4 nü agitsü. Iba senden nung SCO Bodies ana - Secretarial aser SCO RATS nungi tekolaktem adentsü. Iba senden nung 'guest of the Chair' ama Turkmenistan adentsü.

Iba senden nung international aser regional organisation trok - UN, ASEAN, CIS, CSTO,

EAEU aser CICA nungia tekolakpur adentsü.

Taküm iba senden ya India lenisüba kübok "Towards a SECURE SCO" omen nung ajemdaker amentsü. SECURE ya Ato Kilonser Modi-i agütsüba lir, tetetzü Security, Economy and Trade, Connectivity, Unity, Respect for Sovereignty and Territorial Integrity, aser Environment alitsü.

"Par lenisüba kübok India iba cooperation indang tongshi tasen songogo - Startups aser Innovation; Traditional Medicine; Digital Inclusion; Youth Empowerment; aser Shared Buddhist Heritage. Iba den ano India-i nisung tsungta tesendaktep asoshi mera tuluba agia asenok linüktem tsungta puti otsü aser civilization tsütsü tesendaktep benjonger. Item rongnung Varanasi ajanga ayongzükba socio-cultural

sentong balala lir aser ibai mezüngbuba SCO Cultural and Tourist Capital for 2022-23 indang framework lir," ta sangdong ajanga ashi.

SCO nung India lenisüba kübok zungsem linüktem tsungta ajak ajangzüktsüsa amalitepba mapang ajangshio, ta sangdong ajanga ashi.

India tir asüba mapang senden aser sentong 134 agiogo aser yangji ministerial-level senden 14 densema liasü. "Iba tentet tajungba akumtsü asoshi India-i bendanga agütsür inyaker aser mendenpuba kümsük tembangba ama SCO Summit takok nung agitsü imla atar," ta sangdong ajanga ashi.

Tir melentepa inyakba SCO nung India indang kümsük ya September 2023 tashi lir.

Shanghai Cooperation Organisation (SCO) Council of Heads of State Summit nung

Pakistan Ato Kilonser Shehbaz Sharif adentsü telemtetba agiba pela agizüker, ta India sorkari ashi.

"Video conference yimya nung July 4, 2023 nü amentsü aliba 23 buba Meeting of SCO Council of Heads of State (CHS) nung Ato Kilonser Mujammad Shehbaz Sharif adentsü. Ato kilonser dang SCO-CHS nung adentsü India indang ato kilonseri SCO indang Chair ama jaok. CHS nung ato kilonseri shilem agiba ajanga Pakistan ya SCO nung tongtipang linük ka lir ta sayur. Ibai regional security aser yimchiyimjung asoshi tongtipang tentet ka lir," ta Pakistan Prime Minister's Office ajanga sangdong ka nung ashi.

Taoba mapanga Pakistan sorkari iba senden nung Shehbaz Sharif adentsü akok ta shia liasü, saka tejangjabo magütsü.

National Championship nungi Nagaland Wushu Association tsükogo



Pune nung Hokulbarnü Nagaland Wushu Association team nungi asayatem aser with Suhel Ahmed, Chief Executive Officer, Wushu Association of India külemi tangokba noksa ka yangi angur.

Kohima, Aami/June 30 (TYO): Nagaland nungi asayar tajung ana tapubang lokpeta masayateti Pune kübok Chatrapati Sports Complex nung 32 buba National Championship 2023 nungi Nagaland Wushu Association team tsükogo.

Iba championship nung Nagaland nungi asayar pongui category balala nung shilem agia liasü aser parnokji Rakesh Mahato, Mankho T konyak, Kethosilie Kuosa, Atokivi T Chishi, Keyisuiding Lungalang

liasü aser Gabriel Khamo aser Azhove Resu na coach aser manager ama shilem agia liasü. Nagaland nungi tajungtiba ana, Kethosilie Kuosa (52kg) aser Atokivi T Chishi (60kg) na round tanabuba nung tapubang lokdanga liasü.

Mezüng bouts nung takok nguaka tenaprong pei asaya nungi anentsüsa akum.

Rakesh Mahato (70kg) aser Keyisuiding Lungalang (75 kg) na pre-quarter final tongtet saka iba sülen tera agi tamakok ajurua national games atema terara agi

qualify mesütet.

Referee temi telemtetba junga magitetba ajanga seret 56 telemsa nung Mankhoi T Konyak-a tsüka liasü.

Iba sentong nung association 45 nungi asayar 1500 dak tema arua shilem agia liasü. Iba sentong ya Wushu Association of India ajanga ayongzüik aser Maharashtra Wushu Association host liasü.

Nagaland team ya Pune nungi Honibarnü ayamesotsü aser Mongulbarnü Nagaland tonga arutsü.

1st Women Football League: KISCE Kohima aser PDW FC final asayatsü

Dimapur, Aami/June 30 (TYO): Tang tasayadak 1 buba Nagaland Open Women Football League cum Knockout tournament final nung Khelo India State Centre for Excellence (KISCE) Kohima aser Peren District Women Football Club (PDW FC) asayatsü.

Iba asayamung ya Department of Youth Resources & Sports, Nagaland ajanga Indira Gandhi Stadium Kohima nung ayongzüikba lir aser final ya Honibar

nikongdang 5:30 ako nungi asayatsü.

Hokulbarnü league matches tatembang buba ana asayadang PDW FC-i par asaya nung takok angu aser Football Association Phek District aser Northern Angami Youth and Sports Association-C goal kata magütsüteti tembang.

Mezüng asaya nung PDW FC-i Hilly Girls FC madak goal 4-1 agi takok angu.

Iba asaya nung PDW FC nungi Abinuo-i goal asem agütsü aser Ruth-i goal ka

agütsü. Hilly Girls nungi goal ka ya Thenozolu-i agüja liasü.

Tanabuba asaya nung Football Association Phek District aser Northern Angami Youth and Sports Association-C nungi katia goal magütsüteti draw nung tembang.

Iba sayamung ayonger temi sangdong ka ajanga ashiba agi, Nagaland Football Association aser Youth Resources & Sports Department nungi arishi küm 40 aser temapur exhibition match ka IG Stadium nung nikongdang 3:00 ako nungi asayatsü.

Asia nung küm 30 Tsüngrem tenzüksang... (Tapak 5 nungi...)

1992 küm nunga pai 'China nung Khristan yimsü puti otsü' (History of Christianity in China) kaket zülua adok.

Paisa China nung puti otsü, Confucianism, Lu Xun (China nung kaketzülur) aser putu tasenba nung China nung tebilemtsü onük balala zülü.

Missionary, Charbonnier-i China nung ketdangsertemi temelaba agütsüba Arogotem aser independent Arogotem tsüngda longjema alitsü asoshi kanga meranga inyak. Ibayongji China nung Khristantemi pa dang "tajangzüik agütsüsang" ta nungja agütsü.

Pa 1931 küm January 3 nü France yimtiba, Paris nung aso. Pa Versailles seminary ka nung azüng aser theology renemba sülen Paris Foreign Missions Society (MEP) nung aden.

Pa 1957 küm December 21

nü 'ordain' asüba sülen 1957 küm MEP-i pa Malaysia kübok Malacca-i yok. Yangji pai China oshi den külemi tanga oshi balala angazüka liasü.

1970 nungi 1974 küm tashi Paris kübok Bièvres nung aliba MEP seminary nung pa tesayur inyak aser missionary studies center ka nunga inyak.

Iba sülen pa Taiwan-i oa küm ana shi theological research agiba sülen doctoral thesis atem.

Pai pa taküm otsü züluba kaket nung 1974 küm pai China nung Arogo dak ranglokba indang shia lir.

"Missionary mapa inyakba nung kü mangdang melenshi.

Alima nung Khristantem atema tebilemtsü akaba linüktem rongnung China densema lir. 1974 küm September ita nung Louvain symposium sentong nung ni kanga tongtibang

telemtetba ka agi. Ni China indang study asüba ajanga China nung Arogotem lenitsü," ta pai kaket nungji zülua lir.

1980 küm mungdang nung MEP-i pa Singapore nung Catholic Junior College nung Chaplain shim aser 1983 küm tashi pa yangji Chaplain inyak.

1981 küm MEP-isa pa China Catholic Communication (CCC) nung Director shim aser 1988 küm tashi pa Director inyakba sülen Paris-i arua "China Service" Director inyak.

Pa akümli piyong nung pai China aser Hong Kong nati 40 ben dak tali oa liasü.

2012 küm Charbonnier nem France nung tematiba tetushi sempet 'Legion of Honor' agütsü.

Charbonnier den tatembangbuba astüpila sentong July 4 nü Lauris nung agütsü.

8 buba Nagaland Shooting Championship alitsü

Dimapur, Aami/June 30 (TYO): Small Bore Rifle/Pistol, Shotgun Trap aser Big Bore Rifle (NR) nung 8 buba Nagaland Shooting Championship 2023 sentong Aries Sports Complex Shooting Range, Dimapur nung July 24 nungi July 28, 2023 tashi alitsü, ta Merang Jamir, president, Nagaland Rifle Association ajanga sangdong ka nung ashi,

Iba tetoktepa ya NRAI Match Book 2022 (amended) kübok temzüng ozüng agi melaba ama alitsü.

Iba tetoktepa ya Aries Rifle And Pistol Shooting Academy, Khelo India Centre ajanga ayongzüiksü aser Nagaland Rifle Association ajanga tsünglanglen agüja aliba ama agütsü.

1. 10m Air Rifle
2. 10m Air Pistol
3. 25m Standard Pistol
4. 25m Pistol
5. 25m Rapid Fire Pistol
6. 50m Rifle Peep Sight Prone
7. 50m Rifle Open Sight Prone
8. Shotgun Trap
9. Big Bore Rifle Peep Sight Prone

Arsenal-i Chelsea nungi Kai Havertz alizükogo



New Delhi, Aami/June 30 (Agencies): Arsenal-i Germany nunger attacking midfielder Kai Havertz Chelsea nungi alizükogo. Pa den küm talangka atema tenangzüktepa yangluogo.

Asayar alizükba indang senotsü osang tejangja club anapronglai magütsü, ajisüka British media sangdong balala ajanga ashiba agi, Arsenal-i Chelsea nem pound million 65 mesüra 75 agütsür alitsü.

Tang transfer window nung Arsenal puri mezüngbuba Havertz alizükogo. Ajisüka British media sangdong balala ajanga ashiba agi, club-i West Ham nungi England midfielder Declan Rice alitsü atema pound million 105 agütsütsü asoshi mulunga agizükogo.

2020 küm Bayer Leverkusen nungi Chelsea nung arua adenba sülen Havertz-i season asem nung club tenüng nungi 139 ben asayaogo aser iba mapang goal 32 idaktsüogo. Pai 2021 küm UEFA Champions League final nung Manchester City den

asayaba mapang goal ka idakja par team nem takok agüja liasü.

Arsenal pur Premier League nung taoba season tanabuba jenjang nung tembang aser kasa mapang nung Chelsea pur 12buba nung tembanga liasü, shirnok tang team yanglushiba mapang ka lir.

"Arsenal team indang tangatetba temaba jenjang nung lir aser aji meteter, ibayongji tawa Arsenal den asayatsü kanga tasak kümogo," ta Havertz-i ashi. "Nükjidongi takok marok akoktsüba atema lir aser ni takokba tashi meranga inyaktsü," ta pai ashi.

Havertz-isa, sangdong ka ajanga Chelsea den tepila osang ka lemsatepogo, koba pai ashiba agi pa asoshi tanabuba ki ama liasü. Paisa, pa nongita yariba fan tem dang kanga pelaba lemsatepogo.

Kasa mapang nung Arsenal coach Mikel Arteta-i, "Kai ya asayar tajung ka aser pa kanga tesangra asayar ka lir. Pai midfield nung onok tali tashi taitba kümdaktsütsü," ta ashi.

Changtongya nung Career... (Tapak 2 nungi...)

Paisa Class VI nungi Class XII tashi atema training balala agütsüba indang lemsatepa liasü.

Sentiwapang, NPS, Assistant Commandant, 9 IR ajanga "Career Guidance" indang jembidang, career yangertsü asoshi shisa kaa renemtsü aser sentong yanglutsü ayongzüik.

Graduation tashi ya tashi tait mapang lir aser course melenshitsu atema lenmangtem peria lir, ta pai ashi.

Paisa competitive exam

balala atema renemshitsu asoshi kaketshir dang lenmang sayua liasü.

Iba sentong nung CEDT Board Member, Nokin Lkr, NPS ajanga tarur pela agizükba o jembi aser CKT tir Longjakrep Jamir, Changtongya Village Council züngsem I Kumzuk Longkumer nungeria o tatsütsü jembia liasü.

Iba sentong nung Punaluba Longkumer, Convenor of CEDT menden liasü aser paisa melepzüng o jembia liasü.

BILEMDANGANG

"Tiyazü jembirji temlung dazüng asütsüla."